

Suleriaatsimut allannguut 22. november 2019-meersoq

(Ataatsimiititaliat ataatsimiinnerini paasissutissat isertuussassat atorussallu isertuussassat suliarineqartarneri, Naalagaaffiit Peqatigiit ataatsimeersuarnerannut Nunat Avannarliit Siunnersuisoqatigiiffiannullu qinerseriaatsip allanngortinneqarnera, Inatsisartunut ilaasortat partiillu aalajangiiffigisassatut siunnersuutaasa aningaasatigut allaffissornikkullu kingunerisassaasa allaaserineqartarnerata Naalakkersuisunut nuunneqarnera, apeqquteqaat tunngavigalugu oqallinnerni Inatsisartut oqaaseqaateqarsinnaanerannut periarfissap atorunnaarsinneqarnera, § 37 malillugu apeqquteqartarnermut suleriaatsip erseqqissarneqarnera, Inatsisartut ukiuata aallartittarnerata ukiakkullu ataatsimiinnerup ammarneqartarnerata immikkoornerisa erseqqissarneqarnera, apeqquteqaat aallaavigalugu oqallinnissamik siunnersuutinik tunniussisarnermut kingusinnerpaamik tunniussisarnissamat piffissaliineq, ullormi ataatsimiiffiusussami tullermi oqaluuserisassani immikkoortut nalunaarutigineqassaarneri, Inatsisartut Siulittaasoqarfiannut sinniisussat Inatsisartut ataatsimiinnerinik aqutsisinnaalernerat, Inatsisartut nersornaasiisarneri taamaaqataannillu tunniussisarneri pillugit aalajangersakkap atorunnaarnera, aalajangiiffigisassatut siunnersuutit, apeqquteqaat aallaavigalugu oqallinnerit akunnerlu apeqquteqarfiusinnaasoq eqqarsaatigalugit piffissat oqaaseqarfiusinnaasut allanngortinneqarneri, sivisunerusumik oqaaseqarsinnaanermik qinnuteqartarnermut piffissaliussap allanngortinneqarnera, ilaqutariiusutsimi isiginiagassanik pingaarutilinnik tunngaveqartumik najuutinngikkallarsinnaalernerneq, piffissat sulinnigiffeqarfiusut najuutinngikkallarnerillu ukiumoortumik nalunaarummi nalunaarsorneqarnissaannut pisussaaffiup atorunnaarsinneqarnera kiisalu sinniisussanik ataatsimiigiaqqusisarneq.)

§ 1

Inatsisartut Suleriaasianni 12. november 2010-meersumi, 22. september 2011-mi, 29. maj 2012-imi, 28. maj 2015-imi aamma 1. juni 2016-imi allanngortinneqartumi, tulluuttut allanngortinneqassapput:

1. § 12-ip kingornanut § 12 a-tut ilanngunneqassaaq:

” **§ 12 a.** Paasissutissanik atorussanilluunniit isertuussassanik ataatsimiititaliaq suliarinnissatillugu ataatsimiititaliap aalajangersinnaavaa ataatsimiititaliap ataatsimiinnera oqaluuserisassaniluunniit immikkoortup aalajangersimasup suliarineqarnera internettimut attaveqarani atorunillu elektroniskiusunik assersuutigalugu oqarasuaatinik angallattakkanik, qarasaasianik tabletinillu atortoqarani ingerlanneqassasoq.

Imm. 2. Ataatsimiititaliap aalajangersinnaavaa ataatsimiinnermi atorussat isertuussassat tamarmik taamaallaat pappiarannorlugit pigineqassasut ataatsimiititaliallu ataatsimiinnerani suliarineqareerunik uterteqqinneqarlutik.”

2. § 26, imm. 3, ima oqaasertaqassaaq:

” *Imm. 3.* Ataatsimiititalianut, siunnersuisoqatigiinnut aalajangiisartutullu ataatsimiititalianut il.il. ilaasortanik marlunnik amerlanerusunilluunniit qinersisoqassatillugu qanoq

amerlatigisunik ilaasortaatitaqarneq najoqqutaralugu qinersisoqartassaaq, taamaattorli § 26 a takujuk.”

3. § 26-ip kingornanut ilanngunneqassaaq:

” **§ 26 a.** Naalagaaffiit Peqatigiit ataatsimeersuarnerannut sinniisuutitassanik marlunnik taakkulu sinniisussaannik marlunnik qinersisarneq paarlakaajaalluni peqataatitaqartarnermik najoqqutaqarneq malillugu pisarpoq, imaalillugu: Partii ilaasortaatitaqarnerpaaq kattusseqatigiilluunniit ilaasortaatitaqarnerpaat ilaasortaqaassutsikkullu tulliuttut tamarmik immikkut qinersinerup kingorna ukiumut siullermut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaatitaqassutsikkut pingajuat sisamaallu qinersinerup kingorna ukiut aappaannut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaatitaqassutsikkut tallimaat arferngallu qinersinerup kingorna ukiut pingajuannut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaatitaqassutsikkut arfineq-aappaat arfineq-pingajuallu qinersinerup kingorna ukiut sisamaannut sinniisuutitassaminnik ataatsimik taassumalu sinniisussaannik ataatsimik qinersissapput.

Imm. 2. Sinniisuutitaq taassumalu sinniisussaa parteeqatigiissapput kattusseqatigeeqatigiissallutilluunniit. Partii kattusseqatigiilluunniit ataasiinnarmik ilaasortaatitaqarpat partiip kattusseqatigiilluunniit sinniisuutitaannut sinniisussamik qinersisoqassanngilaq.

Imm. 3. Partiit kattusseqatigiilluunniit arlallit amerlaqatigiinnik ilaasortaatitaqarpata, taakku tulleriinnerat makitsinikkut aalajangerneqassaaq.

Imm. 4. Inatsisartuni partiit kattusseqatigiillu amerlassusii katillugit arfineq-pingasunit ikinneruppata paarlakaajaaneg aallaqqaataaniit aallarteqqinneqassaaq partiit kattusseqatigiillu tamarmik sinniisuutitaqarnissaminnut periarfissaqareerpata.

Imm. 5. Sinniisuutitaasartussat tulleriiaarnerat qinersinerup kingorna inissitsiterfusumik ataatsimiinnermi aalajangersarneqassaaq qinigaaffimmullu tamarmut atuutissalluni.”

4. § 29, imm. 2, ima oqaasertaqassaaq:

” *Imm. 2.* Suleriaatsimut ilanngussaq 1-imi oqaaseqarnissamut piffissarititap naapertorlugit siunnersuuteqartoq periarfissaqarpoq Siulittaasoqarfimmit akuerineqarluni siullermeerinninnermut saqqummiussinermi siunnersuut kingunerisassaalu pillugit naatsumik nassuiaateqarnissaminut.”

5. § 36, imm. 4, atorunnaassaaq.

6. § 37 ima oqaasertaqassaaq:

” **§ 37.** Inatsisartunut ilaasortaqaq pisortat suliaasaataat pillugu paasissutissinneqarnissaminik kissaateqarpat, tamanna Naalackersuisunut apeqquteqarnikkut pisinnaavoq. Allakkatigut apeqquteqartoqassaaq Inatsisartut Siulittaasuannut tunniunneqartussamik. Inatsisartut Siulittaasuata apeqqut Naalackersuisunut ingerlateqqissavaa, assilinera Inatsisartunut ilaasortanut allanut nassiuutiitigalugu. Apeqqut naatsumik erseqqissumillu oqaasertalerneqarsimassaaq tunngavilersuutitaqassallunilu. Ataatsimik assigiimmillu tunngavilersuutitaqarluni arlalinnik apeqquteqaraanni apeqqutit normulersorneqarsimassapput naqinnerilluunniit malillugit tulleriinnersorneqarsimassallutik.

Imm. 2. Naalackersuisut apeqqummut akissuteqarnissaminnut pisussaaffeqanngillat:

- 1) Naalakkersuisut paasissutissanik akissuteqarnissaminnut atugassaminnik pissarsisinnaanngippata,
- 2) malunnartumik piffissaq nukissallu paasissutissanik akissuteqarnissamut atugassanik pissarsiniarnermut atortariaqassappata, imaluunniit
- 3) paasissutissat kissaatigineqartut nipangiussisussaaitaanermut ilaatinneqarpata.

Imm. 3. Akissutip ilusissaa pillugu apeqquteqartup kissaatigisaanut Naalakkersuisut pituttorsimannngillat.

Imm. 4. Naalakkersuisut akissuteqaataat Inatsisartut Siulittaasuannut tunniunneqartassaaq, taassumalu akissut apeqquteqartumut ingerlateqqittassallugu, assilinera Inatsisartunut ilaasortanut allanut nassiutiitigalugu.

Imm. 5. Apeqqutit akissuteqarfigineqarnissamik tungaanut tunuartinneqarsinnaapput. Apeqqutit allanit saqqummiuteqqinneqarsinnaanngillat.

Imm. 6. Apeqqutit Inatsisartut nittartagaanni tamanut saqqummiunneqartassapput. Akissutit isertuussassatut naqissuserneqarsimannngikkunik Inatsisartut nittartagaanni tamanut saqqummiunneqartassapput.

Imm. 7. Inatsisartut ataatsimiinnerisa piareersaasiorneqarnerannut atatillugu Inatsisartut Siulittaasoqarfiat sapaatip akunneranut ataasiarluni nalunaaquttap akunneranik ataatsimik sivisussusilimmik apeqquteqartarfissamik aalajangersaasinnaavoq, Inatsisartunut ilaasortat malaatiinnarlugu nalunaarutigeqqaarnagulu Naalakkersuisunut ingerlaannartumik akisassamik apeqquteqarfigisinnaasaannik. Naalakkersuisut nalunaarpata apeqqut akissuteqarfigisinnaanagu suliarinera taamaalilluni naammassineqassaaq. Sapaatip akunnikkaartumik akunnermi apeqquteqarfiusartumi aalajangiisoqarsinnaanngilaq.”

7. § 38, imm. 4, ima oqaasertaqassaaq:

” *Imm. 4.* Inatsisartut ileqquusumik katersuunnermi Inatsisartut tullianik ileqquusumik katersuunnissaannut piffissaq ataatsimiiffiususaaq aalajangissavaat.”

8. § 40, imm. 2, ima oqaasertaqassaaq:

” *Imm. 2.* § 36 malillugu apeqquteqaatit ilusissarititaasutut iluseqarlutik Inatsisartut Siulittaasuannut tunniunneqareersimassapput ataatsimiinnissap apeqquteqaatip oqaluuserineqarfissaatut kissaatigineqartup aallartinnissaa kingusinnerpaamik sapaatit akunnerinik marlunnik sioqqullugu.”

9. § 43, imm. 2, atorunnaassaaq.

Imm. 3-4 tamatuma kingorna *imm. 2-3-nngussapput.*

10. § 47, imm. 1, ima oqaasertaqassaaq:

” Inatsisartut Siulittaasuata imaluunniit siulittaasup tulliaata siulliup, tulliaata aappaata, pingajuata sisamaataluunniit taakkuluunniit sinniisussaasa akunnerminni isumaqatigiissut malillugu Inatsisartut ataatsimiinneri aquttarpaat.”

11. § 53, imm. 2, ima oqaasertaqassaaq:

” *Imm. 2.* § 24 naapertorlugu siunnersuisoqatigiiffinnut aalajangiisartutullu ataatsimiititalianut il.il. qinersinerit tamatigit matoqqasumik ingerlanneqartassapput.”

12. § 55 ima oqaasertaqassaaq:

” § 55. Inatsisartut Siulittaasoqarfiata Inatsisartut isumaqatigiinniarneri Inatsisartut nittartagaanni kalaallisut qallunaatullu tamanut saqqummiuttassavai.”

13. *Ilanngussaq 1*-imi, *Oqaaseqarnissamut piffissaritat*, immikkoortoq ”Inatsisartut aalajangiiffigisassaattut siunnersuutit Inatsisartunut ilaasortanit saqqummiunneqartut.” ima oqaasertaqassaaq:

” **Siullermeerinnineq**

Saqqummiussineq	5 min.
Naalakkersuisut akissuteqaataat	5 min.
Partiit oqaaseqarneri	15 min. (Partii ataaseq apeqqutit 3)
Malitsitut oqaaseqarnerit	1 min.
Malitsitut oqaaseqarnernut akissutit	2 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera	5 min. (Partii ataaseq apeqqutit 2)
(Apeqqutit tamarmik minutsi ataaseq. Akissutit tamarmik minutsit marluk)	

Aappassaaneerinnineq – Allannguutissatut siunnersuuteqartoqarsimangippat

Naalakkersuisut akissuteqaataat	5 min.
Partiit oqaaseqarnerit	2 min. (Partii ataaseq apeqqutit 3)
Malitsitut oqaaseqarnerit	1 min.
Malitsitut oqaaseqarnernut akissutit	2 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera	5 min. (Partii ataaseq apeqqutit 2)
(Apeqqutit tamarmik minutsi ataaseq. Akissutit tamarmik minutsit marluk)	

Aappassaaneerinnineq – Allannguutissatut siunnersuuteqartoqarsimappat

Naalakkersuisut akissuteqaataat	5 min.
Partiit oqaaseqarneri	10 min. (Partii ataaseq apeqqutit 3)
Malitsitut oqaaseqarnerit	1 min.
Malitsitut oqaaseqarnernut akissutit	2 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera	5 min. (Partii ataaseq apeqqutit 2)
(Apeqqutit tamarmik minutsi ataaseq. Akissutit tamarmik minutsit marluk)”	

14. *Ilanngussaq 1*-imi, *Oqaaseqarnissamut piffissaritat*, immikkoortoq ”Apeqquteqaat aallaavigalugu oqallinnerit.” ima oqaasertaqassaaq:

” Saqqummiussineq	5 min.
Naalakkersuisut akissuteqaataat	5 min.
Partiit oqaaseqarneri	10 min. (Partii ataaseq apeqqutit 2)
Malitsitut oqaaseqarnerit	1 min.
Malitsitut oqaaseqarnernut akissuteqarnerit	2 min.
Apeqquteqaateqartup naggataarutaasumik oqaaseqarnera	5 min. (Partii ataaseq apeqqutit 2)
(Apeqqutit tamarmik minutsi ataaseq. Akissutit tamarmik minutsit marluk)”	

15. Ilanngussaq 1-imi, Oqaaseqarnissamut piffissaritat, immikkoortoq ”Akunnerit apeqquteqarfiusinnaasut:” ima oqaasertaqassaaq:

” Apeqquteqarneq 1 min.

Naalakkersuisut akissuteqarnerat 1 min.

(Akunneq ataaseq qaangiukkaangat akunneq apeqquteqarfiusinnaasoq naammassineqartarpoq kingulliulluni apeqqutigineqartup akineqarneratigut)”

16. Ilanngussaq 1-imi, Oqaaseqarnissamut piffissaritat, ilanngussami oqaaseqatigiit kingulliit ima oqaasertaqassapput:

”Oqaluuserisassani immikkoortuni tamani oqaaseqarnissamut piffissaritat aalajangersarneqarsimasut sanioqqunneqarnissaat Siulittaasoqarfiup akuerisinnaavaa suliap annertussusiata tamanna pisariaqartippagu. Oqaaseqarnissamut piffissaritat minutsinik tallimanik sivisunerusumik taamaallaat sivitsorneqarsinnaapput oqaluuserisassani immikkoortut annertoorejussuit assersuutigalugu aningaasanut inatsisissatut siunnersuutip aamma nunatta karsiata naatsorsuutaasa akuerineqarnissaannik siunnersuutip oqaluuserineqarnerini. Sivisunerusumik oqaaseqarniarluni saaffiginnissutit ataatsimiinnissaq pineqartoq ullormik ataatsimik sioqqullugu ullup qeqqartinnagu tunniunneqareersimassapput. Pisuni immikkorluinnaq ittuni piffissaliussap taassuma sanioqqunneqarnissaa Siulittaasoqarfiup akuerisinnaavaa.”

17. Ilanngussaq 2-mi § 8 ima oqaasertaqassaaq:

” § 8. Pisunut § 7-imi taaneqartutut inngitsunut atatillugu qaammatisiutit malillugit ullut 14-it tikillugit najuutinnikkallarnissamut Inatsisartut Siulittaasoqarfiat akuersissuteqarsinnaavoq, taamatut qinnuteqarneq ilaqutariussutsimi isiginiagassanik pingaarutilinnik imaluunniit pissutsinik immikkut ittunik allanik tunngaveqarpat Siulittaasoqarfiup naliliinera malillugu itigartissallugu naapertuuttussaannigsumik.”

18. Ilanngussaq 2-mi § 11 atorunnaarsinneqassaaq.

19. Ilanngussaq 2-mi, § 14-imi imm. 1-ip kingornanut immikkoortutut nutaatut ilanngunneqassapput:

” *Imm. 2.* Inatsisartut Siulittaasoqarfiat taamaallaat imm. 1 malillugu sinniisussamik ataatsimiigiaqqusisassaaq Inatsisartunut ilaasorta q sivikinnerpaamik ulluni 14-ini peqassanngikkaangat, taamaattoq imm. 3 takujuk.

Imm. 3. Inatsisartut Siulittaasoqarfiata sivikinnerpaamik ulluni 14-ini peqannginnissaq imm. 2-mi taaneqartoq sanioqqussinnaavaa sinniisussamik ataatsimiigiaqqusinninneq Inatsisartut ataatsimiittarfianni ilaasortaataqarnerup allanngorneratigut Inatsisartut aalajangiisarnerisa inernerinut sunniuteqarsinnaappat.”

Imm. 2 tamatuma kingorna imm. 4-nngussaaq.

Allannguutit 1. januar 2020-mi atuutilissapput, taamaattoq imm. 2 takujuk.

Imm. 2. § 37 1. juli 2020-mi atuutilissaaq.

Imm. 3. § 26 a tunngavigalugu sinniisuutitassanik taakkulu sinniisussaannik qinersineq 2020-mi upernaakkut ataatsimiinnermi siullermeerutaasumik ingerlanneqassaaq.

Inatsisartut, ulloq 22. november 2019

Inatsisartut Siulittaasuat Vivian Motzfeldt.